

# Ma fin cura, Trump?

## Avant quatter onns agitads

DA GUIU SOBIELA-CAANITZ

■ **«Quousque tandem abutere, Catilina, patientia nostra?» Questa famosa dumonda retorica da Marcus Tullius Cicero (106 a. Cr.–43 a. Cr.) a ses adversari Lucius Sergius Catilina (108 a. Cr.–62 a. Cr.) fan segir «in petto» bleras e blers oz a Donald J. Trump: «Ma fin cura maldovras nossa pazienza?» En ils davos mais ha Trump (\*14-6-1946) permalà nundumbraivels umans, e blers na pon betg pli perdunar.** Ses cussegliaders vegnan segir a'l moderar, ma quant enavant pon ins padimar in miliardari da passa 70 onns? Il 2020, cur che ses quatter onns da presidenza rivan a fin, vegn el strusch a chattar ina maioritad per reelegger in uman da 74 onns. El, segir da sai, resta lura persuadì da pudair anc reger quatter onns, però il davos pled di il pievel. Ma cuntanscha president Trump insumma ils quatter onns? President Richard Milhous Nixon (1913–1994) ha stuì sa retrair 1974 pervi dal scandal da Watergate. Quai n'era anc mai succedi en ils Stadis Unids e n'è mai pli daventà. Usa pon ins spetgar che Trump stoppia ina giada sa retrair pervi d'in scandal analog e da sia atgna inexperientscha. Il precedent da 1974 lubescha da resguardar sco pussaivel in «Trumpgate» che sfurzass il president a surlaschar ses uffizi a vicepresidente Michael Richard Pence, numnà «Mike Pence» (\*7-6-1959).

### Salvar l'ierta d'Obama

Ma dapi ils 9 da november rapportan gassetas europeicas d'ina grupp politica sin la riva ost da l'Ocean Pacific, en fatscha al Giapun ed a las Insulas Curilas,

che siemia d'ina California independenta. Mo 32,7% da l'electorat californian ha vuschà per Trump, cunter 61,6% per Clinton; il stadi è il pli populà da l'unìun cun 38 milliuns olmas. «La campagna 'Yes California' aspira a separar lez stadi dals Stadis Unids (318,9 milliuns olmas). El ha passa 11 000 gidanters voluntaris che fan reclama per l'indipendenza suenter il triumf electoral da Trump (...). In burgais cun ragischs mexicanas di: 'Nosas valurs en California èn tuttafatg differentas. Nus avain gugent ils immigrads e lain avrir ils cunfins. Nus lain dapli barat internaziunal'» («Die Welt», Berlin, 16 d november 2016). «El País Catalunya» (Barcelona) dals 22 da november scriva: «La California è quel stadi [dals USA] che dumbra dapli immigrads. Ses president ha beneventà il president federal elegi declerond che la California na cedia betg areguard sia politica contra la midada climatica, nua ch'el applitgescha insaquantas da las normas las pli rigurusas (...). El ha era quità per il futur da la lescha da sanadad publica promovida da president Barack H. Obama; lezza novaziun ha'l beneventà cun entusiassem. La presidenza da Trump pudess manar ad in conflict tranter instituziuns californianas e federalas.» Quai paisa a curta vista bler dapli ch'il project d'indipendenza che «Le Monde» (Paris) dals 23 da november numna «in'utopia politica».

### Tranter California, China e Germania

Ils projects da Trump vegnan a far frunt ad opposiziuns internaziunalas pli fermas che la California. Alexander van der Belen («VDB»), candidat a l'elecziun dals 4 da december a la presidenza da l'Austria,

ha ditg ils 10 da november: «Cun grond respect m'associescha a quests plets da chanceliera federala Angela Merkel: 'La basa d'ina cooperaziun futura cun ils Stadis Unids ha num democrazia, libertad, respect dal dretg e dignitad dal carstgaun, senza resguardar derivanza, colur da la pel, religiun, schlattaina, orientaziun sexuala u tenuta politica.'» La «Süddeutsche Zeitung» (Minca) dals 21 da november rapporta che Merkel (\*17-7-1954) haja «Stunden über Stunden darüber nachgedacht» (p. 3) e pir lura decidi da candidar puspè il 2017. La gassetta commentescha: «Circumstanzas exteriuras han liberà la chanceliera da la fadia da decider.» Tge circumstanzas? Ina è segir la medema che ha stimulà «VDB» ad arranschiar lezza conferenza da pressa: L'elecziun nunspetgada da Trump. Merkel è adisada da far frunt a president Vladimir Vladimirovitch Putin (\*7-10-1952), il signur da las Curilas; lezza ha ponderà ch'i saja pli prudent ch'ella sezza fetschia frunter ad in schani uschè incalculabel e privlus sco il futur collega Trump. Quest vegn pia a sa mesirar a persunalitads internaziunalas sco Merkel, Putin ed il president chinai ed a medem temp a quatter stadi US cun mintgamai in «governor» da la Partida democratica e pli pauc che 40% da vuschs per il nov president\*. Nus astgain ans legrar sin quatter onns fitg variads.

\* Sper la California da «governor» Jerry Brown sa tracti da New York (Andrew Cuomo, 37,5% per Trump), Rhode Island (Gina Raimondo, 39,8%) ed il stadi da Washington (Jay Inslee, 38,2%). Cuomo e Raimondo èn da derivanza taliana. Il Washington, sco era la California, ha ina fatschada sin l'Ocean Pacific.